

Prilog 6.1.3. Specifični uslovi Postupak utvrđivanja prava na povlastice za korištenje usluga fiksne mreže po osnovu zakona koji važe u BiH

a. Utvrđivanje prava na povlastice po osnovu Zakona o profesionalnoj rehabilitaciji, osposobljavanju i zapošljavanju osoba sa invaliditetom

Zakonom o profesionalnoj rehabilitaciji, osposobljavanju i zapošljavanju osoba sa invaliditetom (Službene novine FBiH br. 09/10) utvrđeno je da privredna društva, ustanove, organizacije lica sa invaliditetom i zaštitne radionice plaćaju telefonske usluge pod uslovima koji važe za domaćinstva.

Za utvrđivanje prava na povlastice koriste se preporuke koje je dostavio Fond za profesionalnu rehabilitaciju i zapošljavanje lica sa invaliditetom FBiH:

- Za **privredna društva za zapošljavanje osoba sa invaliditetom** kriterij za identificiranje subjekata koji ostvaruju ovu povlasticu je da na ukupan broj zaposlenih imaju najmanje 40% osoba sa invaliditetom čiji stepen invaliditeta je 60% i više, a najmanje 3 (tri) takve osobe (član 21. pomenutog Zakona).
- Za **zaštitne radionice** kriterij je da na ukupan broj zaposlenih imaju najmanje 40% zaposlenih osoba sa invaliditetom čiji je stepen invaliditeta 70% i više, a najmanje 6 takvih osoba, plus 20% osoba sa stepenom invaliditeta od 100% koje ostvaruju pravo na dodatak za pomoć i njegu od strane druge osobe (član 29. Zakona).

Kao dokaze za ostvarivanje ovih povlastica navedeni subjekti pored općih identifikacijskih dokumenata (rješenje o registraciji, rješenje o razvrstavanju prema djelatnosti i uvjerenje o poreznoj registraciji) trebaju dostaviti slijedeće dokumente:

- spisak zaposlenih izdat od strane Poreske uprave FBiH,
- nalaz i mišljenje nadležnog stručnog organa za ocjenu invaliditeta, odnosno radne sposobnosti, odnosno rješenja o ostvarivanju prava na dodatak za tuđu pomoć i njegu za svaku zaposlenu osobu sa invaliditetom.
- Za organizacije osoba sa invaliditetom smatraju se organizacije koje okupljaju osobe sa invaliditetom čiji je stepen invalidnosti 60% i više, koje su osnovane sa ciljem da vrše promoviranje i zaštitu njihovih interesa i prava. Prema vrsti invaliditeta osoba koje okupljaju, to su udruženja odnosno savezi slijepih, gluhih i nagluhih osoba, paraplegičara, osoba sa mišićnom distrofijom i sl., kao i statusne organizacije ratnih vojnih invalida i civilnih žrtava rata.

Navedene organizacije dokazuju svoj status i ulogu slijedećim dokumentima:

- Ovjerena kopija rješenja o upisu u registar udruženja građana,
- Ovjerena kopija Rješenja o razvrstavanju pravnog lica prema djelatnosti (statistika),
- Ovjerena kopija uvjerenja o poreskoj registraciji sa identifikacionim brojem.

Privredna društva, ustanove, organizacije lica sa invaliditetom i zaštitne radionice koje ispunjavaju navedene uslove, za ostvarivanje povlastica podnose zahtjev nadležnoj regionalnoj Direkciji BH Telecoma (prema mjestu svog sjedišta), uz prilaganje navedene dokumentacije.

b. Utvrđivanje prava na povlastice po drugim pravnim osnovama

Podnosioci zahtjeva za korištenje povlastica, čiji zahtjev se zasniva na nekom drugom pravnom osnovu, pored općih identifikacijskih dokumenata (rješenje o registraciji, rješenje o razvrstavanju prema djelatnosti i uvjerenje o poreznoj registraciji), trebaju dostaviti i odgovarajući dokaz iz kojeg proizilazi da spadaju u kategoriju na koju se odnosi pravni osnov na kojem temelje svoj zahtjev.